

Inatsisartut 2012-mi ilassutitut aningaasaliissutitut inatsisissaattut siunnersuut

(Aningaasaqarnermut Nunamullu Namminermt Naalakkersuisoq)

Saqqummiussinermut allakkiaq

(Aningaasaqarnermut Nunamullu Namminermt Naalakkersuisoq)

Siullermeerneqarnera

Matumuuna Naalakkersuisut sinnerlugit Inatsisartut 2012-imi ilassutitut aningaasaliissutitut inatsisissaattut siunnersuut saqqummiuppara. Missingersuusiortarneq pillugu inatsimmi § 26-mi aalajangersakkani allassimavoq ukiup aningaasaliiffiusup ingerlanerani aningaasaliissutit oqaasertaliussallu nutaat allanngortitaluunniit ilassutitut aningaasaliissutitut inatsimmut ukiumi tulluuttumi saqqummiunneqartussami ilanngunneqartassasut.

Taamaalilluni Inatsisartut 2012-imi ilassutitut aningaasaliissutitut inatsisissaattut siunnersuut aningaasaleeqqinnermut inatsisitut isigineqartariaqarpoq. Ilassutitut aningaasaliissutitut inatsisikkut Naalakkersuisut aningaasanut inatsimmut oqaasertaliussani piginnaatitsissutit Inatsisartullu Aningaasaqarnermut Ataatsimiititaliaata ukiumi aningaasaliiffiusumi 2012-imi aalajangeriigaat, tunngavigalugit aalajangiisimaneramik pissusissaatut inissiisoqarpoq.

Inatsisartut 2012-imi ilassutitut aningaasaliissutitut inatsisissaattut siunnersuutip imarai ilanngussaq 1 aningaasaliissutit allannguutaannik 2012-imi akuersissutigineqartunik takutitsisoq aamma ilanngussaq 2 taamatuttaaq 2012-imi oqaasertaliussat allannguutaannik akuersissutigineqartunik takutitsisoq.

2012-imut Aningaasanut Inatsit aamma Inatsisartut 2012-imi ilassutitut aningaasaliissutitut inatsisissaattut siunnersuut ukiumi aningaasaliiviusumi 2012-imi aningaasaliissutitut tamarmiusunut takussutissaapput. Taamaalillutik Nunap Karsiata 2012-imi naatsorsuutaanut Inatsisartut ataatsimiinnermi matumani kingusinnerusukkut suliarisassaannut aallaaviupput.

2012-imut Aningaasanut inatsisip takutippaa 221,3 mio. kr.-nik IST amigartooruteqartussatut missingersuusiorneqarsimasoq. Inatsisartut Aningaasaqarnermut Ataatsimiititaliaata 2012-ip ingerlanerani ilassutitut aningaasaliinerit arfineq marluk, IST-p 79,7 mio. kr.-nik amigartooruteqartussatut missingersuusiorneqarsimasumik annerulersitsisut akuersissutigai. Ilassutitut aningaasaliissutitut inatsisissatut siunnersuut taamaalilluni ukiumut aningaasaqarfiusumut 2012-mut IST-mi 300,9 mio. kr. amigartooruteqarfiuvoq.

Taamatut oqaaseqarlunga Naalakkersuisut Inatsisartut 2012-imut ilassutitut aningaasaliissutitut inatsisissatut siunnersuutaat Inatsisartunut suliaassanngortippara.